



朝陽縣志卷三十二

列女四

李瑞姐住縣北哈而腦小家之幼女也父以採樵爲生
母老病不能步履動轉湏人以故年已及笄尙待聘
閨中民國十三年秋適值賊匪猖狂突有匪闖入其
院進室逼姦該女度勢不得免當即誘之曰容我關
閉街門以免旁人進來遂即脫身跳入門畔井內賊
知驚走移時伊父挑柴回家撈救得復活是女雖未
死而其志固矢以必死也亦云烈矣

党王氏住縣北西官營子党丕基之妻王英傑之女年二十六歲夫亡無子女父母欲奪而嫁之氏誓死不從立志守節茹苦含辛支持門戶常因衣食不給久住母家現年六十八歲體尙康強

路彭氏住縣北土城子路景祥之妻彭從吾之妹也二十一歲孀居矢志靡他上孝養翁姑下和睦妯娌持家勤儉雖幾歷艱辛毫不懈怠志享壽六十七歲而終李平氏住縣北郭家溝村年二十八歲夫死生四子家貧如洗度日維艱有同族侄暗將該氏偷賣事洩氏

即逃至親串家藏匿雖有人屢次慫恿志不稍移堅
持守貞迨四子成立補助衣食家漸小康享年六十
二歲而終

鄭程氏住縣城裡磨市原籍山西太原府徐溝姚城鎮
人於清咸豐年間隨夫鄭崗來朝街經商因家焉同
治某年夫病歿遺氏孀居時年三十母家世仕宦系
出名門今乃飢寒將至門無壯丁所生三子長天喜
次天德又次天祿俱幼稚拮据度日鞠養三子爲伯
仲娶妻使各度謀生惟依幼子天祿以居爲娶馬廠

張文清女爲妻於十七歲過門未及十年生二女二子不幸天祿復夭折年僅三十三歲張氏年二十九歲姑媳相倚苦節彌勵斯時家境蕭條猶昔幸仲子天德代料理喪葬事畢同親族言及家無積蓄子女幼弱不易生活弟婦盍自爲計等語張氏與衆言曰氏雖一身上則孀姑在堂下則子女待哺氏獨何心忍拋老幼甘願守志事老撫幼貧富惟命親族無言由是節勵冰霜聽姑含飴弄孫氏晝操井臼夜勤績紡宴如也突於光緒二十六年遭匪徒戴五之亂將

北街舖宅焚燬益無憑藉度日較先時尤難矣所幸
針線生活尙堪敷衍轉瞬兒女皆長大若讀書若婚
嫁次第舉辦誰爲經紀亦惟向隅洒涕而已尤難爲
情者姑年邁性烈衣服飲食稍不周輒暴躁責罵不
少寬假否則負氣走街隣恆經日不回若令人無地
自容者氏恐心跡難明不得已偷食紅礬以明無他
是亦愚昧短見之甚者詎料並未傾生而積年宿疾
寒症反因之掃却焉姑亦由是感悟益重其媳之賢
每家人對語輒揮涕嗚咽迨民國十六年姑病卒享

年九十二歲氏親視含殮喪葬如禮現在氏早見孫枝年已六十五歲勤苦持家尙身體康健如昔云

李周氏縣北豪聰溝褚家杖子李昶春之妻鄰村李家杖子周綱之次妹也幼習閨箴長嫻婦道十九歲于歸昶春伉儷甚篤越三年舉一女至二十三歲李昶春在縣街東蒙科房充繕書患病回家氏晝夜殷勤服侍百般慰解不意天不假年纏綿數月竟至夭亡氏哭泣盡哀立志守節誓死靡他彼時翁姑父母以氏正在青年妙齡又無子嗣可靠孤鸞寡鳳焉能經

久欲奪其志而嫁之氏至死不從幾欲割鼻斷指以示堅決翁父等見其志已誠姑遂其行迨後過其胞侄李生元爲嗣其女適路家杖子李姓斯時氏年已四十餘空閨寂寞孤帳淒涼二十年來兩鬢已霜以節操之堅應有美滿果報孰意造物弄人猶未有極嗣子及其婿皆不肖均遭刑戮在民國紀元時氏年已五十孑然一身無所歸依祇得與其女移度以織紡糊口每食不飽實淒慘而無可告親友族人又勸其再醮藉圖養身氏正色厲聲曰吾生命不辰即已

如此三十年之苦難未亡人決不因一旦飢寒頓改
初志爲世人所笑仍守節如常毫無變意氏現年七
十身體頗康健外孫已成人能任工作互相補助亦
無凍餒之虞查該氏終身冰清玉潔媲美柏舟洵爲
巾幗中完人姑錄之藉資旌揚以激勵末世云

趙孺人顧氏居邑西大房身材趙公瑞符之母舉人俊
儒之祖母也性慈惠而貌尊嚴居家儉勤夫出營商
氏督傭僕治田灌園家計所賴無荒廢失業生三子
四女教以義方不聽游惰幼令習書算長則男就外

傳女課針工不稍寬假夜話燈前教以事親敬長友
於兄弟和睦娣姒持身事人之道中年以後尤好施
與族鄰疾病凍餒酌給藥餌粟米綿絮衣服無吝色
從不令向隅缺望以是爲族黨所矜式仲子瑞符色
笑親承尤得歡心因外家絕嗣歲時祭掃填土移墓
等事皆仲子身任之晚年觀四世孫系出一本男女
計七十餘名口壽享八十

王張氏居縣南鐸子溝生二子次福泉長子早夭氏三
十六歲夫病歿家貧子幼境遇奇阨孀守四十餘年

茹苦含辛莫可傳述及衰邁殘年幸嫡孫某接續持家漸致溫飽可望小康而氏已臥病不起風木之悲能無慘然享壽八十有七歲以疾終

劉氏住縣南劉家杖子劉尙勇之母二十四歲夫故一子無女幸家道小康乃撫孤守志教子尙勇成人後有孫二曾孫數人壽九十歲而終孫曾滿堂焉

張王氏住縣東路家屯邑庠生王綸閣之女適張二十八歲夫故無子女時張氏家業豐厚兄弟衆多賴伯叔照顧矢志守節數年後議徙居乃過繼夫兄之子

連元爲嗣恩勤撫育愛如己出旣長爲娶車氏女爲婦于歸六年生一子一女子名僧保甫二歲連元又天亡王氏車氏兩世孀嫠形影相弔晝夜號泣哀動四鄰幸家尙溫飽辛勤撫孤恨不能助之速長迨僧保弱冠爲娶張氏成婚四年未有子息又病故是時王氏已七十餘歲車氏亦年將半百張氏年纔二十有四三世孀居止守車氏所生一女孤苦之艱集於一門鄉鄰胥爲之感泣賴王氏堅忍卓絕率子媳孫媳一意苦守應酬宗族鄰里格外寬厚辛苦持家仍

舊不懈又過繼張氏夫堂兄之子廼豫爲孫之子以延嗣續廼豫時纔十歲逾五年爲娶汪氏自是志節所感苦境漸得回甘汪氏入門逾年舉一子越二年又生一子是年王氏年八十三歲親見兩玄孫五世同堂喜可知也又越一年王氏八十四歲壽終時爲民國十年現汪氏所生已有三子二女人丁漸盛天意或將昌大其門以爲三世苦節之報乎

王葛氏邑東北大烏蘭王汝惠繼室二十一歲于歸二十六歲而寡孝事翁姑教養前室所生子女迨子成

立娶妻生子而子又夭亡氏與寡媳撫孫操持家務
節勵冰霜四十餘年現年六十六歲

王鄭氏邑東北大烏蘭王俊妻二十一歲于歸三十一
歲夫故治家克勤克儉守柏舟義與乃姑同現年四
十八歲

高崔氏縣城廩膳生高景陽之妻生一子方十餘歲而
夫病卒氏矢志柏舟恩勤教子子名光午字槐亭仍
業儒繼書香年既長爲娶妻白氏于歸時年二十一
歲閱五年而光午亦病歿遺孤僅三歲兩世孀嫠孤

苦萬狀白痛夫早卒未偕白首憤不欲生計惟相從
地下以遂同穴之願奈堂上孀姑無人侍養膝下幼
子宗祧所關輾轉思維兩事未畢夫日不暝非死所
能塞責者遂乃安心守志上侍慈幃先意承志惟恐
念子情切有傷慈母之心下則撫育幼嗣教以義方
姑媳相依者垂二十年及子樹桐成立白年方四十
而髮已蒼然頽白其用心良苦亦可概見一門節孝
兩世冰霜洵可以光宗譜而風世俗矣厥後姑年六
十六歲而終白亦年六十六而終

賈王氏縣治東北兩家子賈舜之妻王善人之季女也
二十二歲于歸三十歲夫病歿生有三女一子子又
夭亡操柏舟節守共姜義承繼夫胞弟一子殷勤撫
育無異己出佐諸叔操持家務有條不紊前清光緒
十七年十月間教匪倡亂家散人離氏獨養翁姑於
母家雖當顛沛之餘未虧孝養之道氏之力也厥後
喪亂旣平家人團聚處妯娌之間無驕容遇子侄之
輩有慈色不矜不伐莫與爭功氏獨有焉現年八十
三歲

潘孫氏住三岔口村潘麟應之妻二十一歲于歸二十四歲夫亡子女皆無過繼他房子爲嗣柏舟自矢爲夫守志已於前清建坊旌表享壽七十歲而終

羅潘氏住羅家溝羅堂之妻十九歲于歸二十歲夫故守節勤儉持家過族侄爲子雖門衰祚薄歷受宗族欺侮終不改柏舟之志現年七十歲

崔林氏住城北十家子崔振東之妻二十一歲于歸二十五歲夫歿僅有一子立志守節撫孤勤儉持家紡織不輟幸子成立家道小康焉